

Formasaun animadór sira nian

BISENTENARIU DON



Tinan ida ne'e, ba animadór sira nia formasaun, sei propoin reflesaun ruma ne'ebé sei tulun sira atu hakle'an topiku tempu ida-idak nian hodi refleto kona-ba Maromak nia Futar Lia no mós esperiênsia eh tradisaun saleziana.

Atu sira bele hetan moris, no moris naresin

(Jo 10,10)

Fulan salezianu ne'e, oratorianu sira sei halo lectio kona-ba Bibi-atan di'ak, nune'e, nu'udar animadór, furak tebes se ita mós refleto kona-ba ita-nia prezensa iha oratorianu sira leet, hanesan bibi-atan di'ak.

Espiritualidade saleziana iha ninia modelu iha Jezús nu'udar Bibi-Atan di'ak, tan ne'e, atu bele moris nu'udar animadór salezianu loos, ita presiza kontempla ilas ida ne'e no foti inspiraun husi nia.



(Jo 10,1-11)

¹Tebes, Ha'u dehan ba imi: ida ne'ebé la tama ba bibi luhan husi lutu matan maibé tama husi fatin seluk, ema ne'e na'okten ida. ²Maibé ida ne'ebé tama husi lutu matan, nia mak bibi atan. ³Nia bolu bibi sira hodi sira nia naran, sira rona nia lia, hafoin nia lori sira ba liur. ⁴Hasai hotu tiha nia bibi sira, nia ba uluk; bibi sira tuir nia, tan sira hatene nia lia. ⁵Maibé bibi la tuir ema leet ida; sira halai husi nia, tan sira la hatene ema ne'e nia lia."

⁶Ne'e mak aiknanoik ne'ebé Jezús hateten ba sira; maibé sira la komprende loloos Jezús koalia kona ba sa. ⁷Ne'e duni Jezús dehan teni ba sira: "Tebes, tebes, Ha'u dehan ba imi: Ha'u mak bibi sira nia lutu matan. ⁸Ema hotu ne'ebé mai uluk liu Ha'u, mesak na'okten no ahu-na'in sira; bibi sira la rona sira nia lia. ⁹Ha'u mak lutu matan. Ida ne'ebé liu husi Ha'u sei hetan di'ak; nia sei tama, sei sai, hodi hetan du'ut matak. ¹⁰Ema na'okten mai atu na'ok, atu harahun de'it. Ha'u mai atu ema hetan moris, hodi hetan moris ne'e wa'in liu tan. ¹¹Ha'u mak bibi atan di'ak. Bibi-atan di'ak saran nia moris ba nia bibi sira.

Ita sei refleto kona-ba pasajen ne'ebé iha molok pasajen ne'ebé oratorianu sira refleto.

Jo, 10 kapitulu ida ne'ebé bele fahe ba parte 2 ho diálogo (loloos kuaze haksesu malu) entre Jezús no fariseu sira. Pasajen ne'ebé ita refleto iha parte dahuluk no ida ne'e mak Jezús nia diskursu ida kona-ba ninia An rasik hodi uza ilas lahanesan: na'okten kontra bibi-atan, odamatan.

Jezús uza linguajen no ilas husi hebreu sira nia esperiênsia loron-loron nian: bibi-atan sira toman atu enfrenta na'okten, atu hamriik iha odamatan oin hodi prevene katak ema seluk bele tama, no mós, dadersan, bainhira bibi sira rona bibi-atan nia lian, sira prontu kedas atu husik nia gia sira. Jezús kompara na'okten no bibi-atan di'ak hodi haree oinsá sira tama no sai husi bibi-luhan; no mós baseia ba relasaun entre bibi-atan no bibi sira.

Jezús fó hanoin katak nia odamatan atu tama ka sai husi moris, katak nia sai meiu salvasaun nian: se mak liu husi Nia hetan moris. Hodi hateke ba Nia, bele rekoñese bibi-atan di'ak bainhira ema akompaña, hatene, tuir, saran nia moris ba bibi sira. Komunitade sarani dahuluk fó sasin kona-ba buat ne'e: iha Jezús de'it sarani sira sente katak sira iha Gia ida, sira sente hakmatek no sira simu aihan. Nune'e, Jo 10,10 interpela liu lider comunidade nian (no bele dehan "animadór sira"): hanesan Kristu, odamatan no bibi-atan, sira tenke saran sira-nia moris, se sira la halo, sira buka sira-nia interese no la hala'o Maromak nia planu.

REFLETE liuhusi ESPERIÉNSIA SALEZIANA

Bibi-atan bele gia ninia bibi sira tanba nia moris hamutuk ho sira, la iha interesse seluk; nia hatene bibi sira nia naran, tanba nia gasta tempu hamutuk ho sira; bibi sira mós hatene bibi-atan nia lian tanba nia la'o hamutuk ho sira nafatin, iha sira-nia oin, ka para atu tulun bibi sira ne'ebé susar atu la'o. Bibi-atan no bibi sira hatene malu didi'ak tanba, liuhusi husi tempu ne'ebé sira moris hamutuk, sira aprende atu konfia malu.

Ita ba lee dokumentu salezianu sira atu kompara buat ne'ebé sira husu ba sira ne'ebé rekoñese an iha Espiritualida de Saleziana, buat ne'ebé foin refleto no ita-nia esperiénsia.



“Projetu edukativu, própriu Sistema preventivu nian, hatudu an nu'udar «patrimóniu espirituál ne'ebé hetan inspirasaun husi Kristu Bibi-atan Di'ak nia karidade» kontempla iha akontesimentu Enkarnasaun nian.”

LOME 36

“Iha Don Bosco no Maria Domenica Mazzarello nia prátika edukativa, métodu salezianu, ne'ebé la'o iha sintonia ho S. Francisco de Sales nia pedagogia santidade nian, hatudu ninia atensaun ba moris loroloron, iha fiar-metin konkretu ba empenhu sira estudu nian, serbisu nian, orasaun nian; iha relasaun ne'ebé karakteriza ho konfiansa, laran-di'ak, amorevolezza, loke an iha perspetiva atu hahú la'o iha dalan santidade nian ne'ebé Maromak husu ba ema ida-idak....

LOME 110

Haka'as-an atu deskobre, hamutuk ho foin-sa'e feto no mane sira, Maromak nia prezensa iha akontesimentu sira loroloron nian mak elementu típiku ida espiritualidade saleziana nian. Relasaun akompañamentu nian tulun atu interpreta, ho matan pozitivu, situasaun sira ambiente rasik nian, akontesimentu sira istória pesoál no sosiál, hanorin atu simu ho neon krítiku no moris buat sira-ne'e ho konfiansa no domin ba vida. Akompañamentu ne'ebé hala'o iha ambiente edukativu ida nia laran mak esperiénsia importante ida iha itineráriu maturidade nian, iha ne'ebé konverje Maromak nia asaun, istória nia Na'in, no foin-sa'e sira nia liahatán ne'ebé livre iha sira-nia kontestu moris nian ne'ebé, dala barak, kontraditóriu no interpelante.

LOME 111

Salezianu sira, iha sira-nia Kuadru refere nian kona-ba pastorál Juvenil Saleziana, tau fraze Jo 10,10 nu'udar título ba kap. 4, kona-ba Sistema Preventivu. No hakerek nune'e:

Espíritu salezianu, ne'ebé simu inspirasaun husi Bibi-Atan di'ak nia estilu, kualifika ita-nia espiritualidade no ita-nia asaun edukativu-pastorál. Espíritu ida ne'e sai konkretu, uluknanain, iha Don Bosco: nia no ninia misaun mak ita-nia pontu refere nian ba iha istoriku no karizmatiku.

Don Bosco oferese ninia moris iha projetu unitariu moris nian: ninia moris nu'udar amlulik, ninia relasaun oinoin, ninia interioridade kle'an orienta hotu atu serbí foin-sa'e sira.

“Nia la halo ain-hakat ida, la dehan liafuan ida, la hahú atividade ida ne'eb'e laiha foin-sa'e sira nu'udar objetivu” Cost sdb, 21

Maromak kontinua bolu ema seluk barak atu kontinua Don Bosco nia misaun ba foin-sa'e sira....

Interioridade apostolika lori atu konxiente liután kona-ba edukadór-bibi-atan nia signifkadu no ezijsia sira: ita presiza buras iha koñesimentu kompletu no kle'an liu kona-ba Kristu, Bibi-Atan, no esperiénsia loos fiar nian iha atividade loron-loron nian. Sekonsagradu sira, leigu sira no foin-sa'e sira la iha atensaun partikulár kona-ba interioridade apostolika, ita sei la iha evanjelizasaun. Karidade pastorál ne'ebé tau abut iha fuan sai espíritu salezianu nia sentru moris nian.



PERGUNTA RUMA atu bele haburas ita-nia esperiénsia nu'udar animadór

- * Evanjellu no dokumentu salezianu sira halo ita komprende katak ita la bele sai edukadór no animadór se la iha koñesimentu kle'an no relasaun metin ho Jezús: iha ha'u-nia loron, ha'u fó tempu hira ba Jezús? Atu reza ba Nia, atu lee Evanjellu?
- * Nu'udar grupu animadór, oinsá ita tulun malu atu hadomi liu Jezús no atu tau Nia nu'udar sentru ba ita-nia atividade sira?
- * Nu'udar grupu animadór sira nian, ita hein saida? No ita buka saida ba ita-nia oratorianu sira?
- * Bibi-atan nia karakteristika sa de'it ita presiza hakle'an liután? Oinsá formasaun grupu nian bele tulun atu halo karakteristika sira ne'e sai estilu moris nian?